

RTR CUNTRASTS

Per l'amur da la pasch

Las tensiuns en l'investgieu da Cuirà èn sa calmadas dapi che Joseph Maria Bonnemain è investg. Conflicts dettia dentant anc adina, di el suenter in onn. Il film da Cuntrasts cun il titel «Per l'amur da la pasch» mussa co che l'atmosfera è sa midada, co che l'investg ha integrà las dunnas e la giuventetgna – ed il film confruntescha era l'investg cun temas dispaiteivels.

PAULA NAY/RTR

Il mintgadi da l'investg *Joseph Maria Bonnemain* cumenza a las tschintg la damaun. Per sa preparar per il di, fetschia el ina mes'ura uraziun e dettia ina baterlada cun Dieu. Suenter la messa vai vinavant en biro, nua che sia assistenta ha semtgà l'agenda cun tut ses terminis. D'in cuntin scalina in apparat – ed el mida dal telefonin, tar il computer vi sin il tablet. Sper las brevs survegn el mintga di var 150 mails e quai da plevons che dovràn ses agid, da medias e da ses personal. El ha da preparar sesidas, ina conferenza da medias ed il predi.

Bler laud, dentant era critica

L'atmosfera en l'investgieu saja sa midada dapi che Joseph Maria Bonnemain è uestg – quai è d'udir da tuttas varts. «Pliras personas en l'investgieu na pudevan betg pli savurar ina l'autra. Quai è per part anc adina uschia. L'investg sa sprova dentant d'unir l'investgieu. Quai dovrà temp – el è dentant sin buna via.» Quai di l'avat da la claustra da Mustér, *Vigeli Monn*. Il vicari dal uestg, *Andreas Fuchs*, di ch'il tun saja sa midà: «La moda da discurren in cun l'auter è autra. I vala uss da tschertgar soluziuns e betg pli ils culpants.»

Crititgà vegn che l'investg na mussia betg adina colur. La presidenta dal cussegl sinodal da la baselgia catolica da Turitg, *Franziska Driessen-Reding* pretenda che l'investg sa posiziuneschia pli cler per exempel puncto la benedicziun da pers omosexuals. «Mussar colur gea, dentant en ina moda che naging na sa senta exclus u offendì», respunda Joseph Maria Bonnemain.



Il nov investg Joseph Maria Bonnemain durant ses trenament. Ina sequenza or dal film da Cuntrasts.

FOTO RTR

Las dunnas e la giuventetgna

L'investg ha er engaschà pliras dunnas en ses team – sia assistenta personala, la scheffa da communicaziun – e per l'emprima giada fan dunnas era part dal cussegl diocesan, la direzziun da l'investgieu. «Umens datti avunda en la baselgia. Mintgin ha sias abilitads – a nus umens manca dentant questa sensibilitad», di il nov investg.

Plinavant ha el fundà in cussegl da giuventetgna che duai s'engaschar en l'investgieu per ils interess da la gliued giuvna. I dettia avunda gremis classic en l'investgieu – la giuventetgna duai purtar in nov vent.

Il film da Cuntrasts vegn emess dumengia, ils 20 da mars 2022 a las 17.25 sin SRF1. El è era da chattar sin www.rtr.ch.

L'investg e l'autura

Per l'autura dal film «Per l'amur da la pasch», *Paula Nay*, èsi stà in'experientscha speziala da pudair accompagnar l'investg. Ella di: «Igl è stà spezial che l'investg è insumma stà d'accord da vegnir accompagnà cun la camera. El è dentant stà avert ed autentic. Jau hai pudì filmar el era en situaziuns plitost intimas, per exempel durant ch'el fa uraziun ni durant il trenament, in mument, nua ch'el va pulitmain a ses cunfins. Mintgatant fascheva el era sgnoccas cun mai, pertge ch'jau saja anc adina vi da filmar. L'investg ha propri bler umor – quai n'avev jau betg spetgà.» (rtr/fmr)